

Namminersorlutik Oqartussat sakkut pillugit inatsimmik allannguissamut siunnersuummik atuutsitsilernissaat pillugu Inatsisartunut aalajangiiffisassatut siunnersuut (Aallaasinik il.il. pigisaqarnissamut ukiunik killiliineq kiisalu aallaasinik il.il. inissiivinnik piumasaqaat)

(Aalisarnermut, Piniarnermut, Nunalerinermut Imminullu Pilersornermut Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit Kalaallit Nunaanni sakkut pillugit inatsisip allanngortinnissaanut siunnersuut matumuuna saqqummiunneqarpoq. Siunnersuummi siunertarineqarpoq, Kalaallit Nunaanni aallaasit pillugit malittarisassat ullutsinnut naapertuunnissaasa qulakkeernissaat.

Sakkut pillugit inatsisip nutarternissaa 2017-imili ingerlanikuuvoq, piffissallu ilaanni piniarneq aallaaniarnerlu pillugit inatsit aaqqiivigineqarnissaat utaqqimaarneqarsimalluni. Piniarneq aallaaniarnerlu pillugit inatsit 2023-mi nutarterneqarpoq, inuussutissarsiutigalugu aammalu sunngiffimmi piniarnermut ukioqqortussutsimut piumasaqaatinik atuutilersitsisoqarluni, siullermut 15-inik aappaanullu 12-nik ukioqalereersimanissamut piumasaqaateqalerluni. Matumani inatsisissatut siunnersuummi piniarneq aallaaniarnerlu pillugit inatsimmi ukioqqortussutsimut piumasaqaatit akuerineqartut aallaavigineqassapput.

Sakkut pillugit inatsimmi nutarterneqartussanngortumi siunnersuutigineqarpoq, aallaasimik imassaanillu paarisaqarnissamut atuinnissamullu 15-inik ukioqalersimanngitsunut killeqartitsinissamik atuutsitsisoqassasoq. Tassa siunissami minnerpaamik 15-inik ukioqaraanni aatsaat kisimiilluni aallaasimik piginnittoqarsinnaassaaq atuisoqarsinnaassallunilu. Meeqqat 12-t 15-illu akornanni ukiullit inersimasumik nammineersinnaassusilimmik, aallaasimik atuinerannut akisussaasumik ilaqarlutik sulii aallaasimik atuisinnaassapput. Meeqqat 12-t inorlugit ukiullit aallaasimik tigummiqqusaanngillat atueqqusaanatillu, taamaattorli piniarni aallaaniarni peqataasinnaallutik.

Aallaasit imassaallu immikkoortinneqarnissaat susassaqqanngitsunillu tikiqqarsinnaannginnissaat qulakkeerniarlugit inatsisissatut siunnersuummi aallaasit imassaallu pillugit inaaliisarnermut aamma nutaanik piumasaqaateqarpoq. Aallaasiivinnik atuinnissamut piumasaqaateqanngilaq, aallaasilli imassaallu tigorianaanngorlugit ataatsimoortinneqannginnissaat qulakkeerneqassaaq.

Inatsisissatut siunnersuummi isumannaallisaanerup annertusarnissaa, ajutoortoqarnissaanut aarlerinassutsip millisarnissaa aammalu ilisimannilluni unioqqutitsisumik aallaasimik atuinerup annikillisarnissaa anguniarneqarput. Meeqqavut inuussutortavullu piniarnermut aallaaniarnermullu sulii ilitersuunneqarsinnaassapput aammalu ukiukitsillutik aallaasimik passussinermut sulii ilikkarsinnaassallutik.

Ajoraluartumik malittarisassanik sukaterineq pisariaqavippoq. 1. januar 2014-imit ukioq manna juunip ulluisa 7-ata tungaanut aallaasit atorlugit inuit 12-t imminut toqussimapput,

aallaasorsorlunilu 11-nik toqutseriaraluartoqarsimalluni. Ataatsimik toqutsisoqarsimavoq, inuillu arfineq-marluk toqunneqarnissamik siorasaarneqarsimallutik. Ukiuni qulini kingullerni aallartoornerit 68-it nalunaarsorneqarsimapput, taakkunani 20-riag inunnik eqquisoqarluni. Inuit 20-t aallartoorfigitittut akornanni sisamat toqupput - nukarleq tallimaannarnik ukiulik.

Pisut uku alianarluinnartut ajoqusernermillu kinguneqartitsisut uagut aallaaniartarnitsinnut piniariaatsitsinnullu tunngassuteqanngillat. Tamanna ersarissassallugu pingaaruteqarpoq. Pisulli ersersippaat malittarisassanik sukaterisoqartariaqartoq. Qamuuna sakkortuumik aalassaqqalluni aallaasimik imalimmik pissarsisinnaanissaq siunissami ajornarnerussaaq. Tamatuma saniatigut meeqqat aallaasimik passussinermik ilinniartillutik inersimasumik misilittagaqarlumut ilaqartarnissaat qulakkeerneqassaaq.

Qularutiginnilara siunnersuut sukumiisumik oqallisigineqassasoq, oqallinnissarlu qilanaarlugu. Uagut inuiaqatigiittut malittarisassanik sukaterneqartariaqartunik aammalu ileqqoralugu piniariaaserput aallaaniartarnerpullu ingerlanneqarnissaannut aqqiissutissanik oqimaqatigiissunik nassaarnissarput Naalakkersuisunut pingaaruteqarlunnarpoq. Inatsisissatut siunnersuummi matumani mianerisassat taakku marluk isiginarneqarput.

Taamatut oqaaseqarlunga siunnersuut matumuuna Inatsisartunut akuersaartumik suliarineqartussanngorlugu tunniuppara. Naalakkersuisut ataatsimiititalianut attuumassuteqartunut erseqqinnerusumik nassuiaanissaminnut piareersimapput.